



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 3



Taoba US Vice President Dick Cheney süogo



Tejashwi-i tetsürtem nem `30k agütsütsü nangzük

VOL. XXIII ISSUE NO. 29 (ADOK 29) DIMAPUR RASEMNÜ (WEDNESDAY) YIMPOKSÜI (NOVEMBER) 05, 2025 ₹ 5.00

Tetsür dak mashii kongshiba atema küm 1 tepuokdak ayutsü

Dimapur, November 4, 2025 (TYO): Kohima nung tebur kati tetsür ka dak teka sangshia la sensamasatsütsü merangba aitsüogo.

Iba nisung ya Zasituo Tsukru lir aser November 3, 2025 nü Principal District and Sessions Court, Kohima-i pa aitsü.

Okadaki pa küm ka tepuokdak ayutsü aser Rs 10,000 senchi achitsü tetuyuba agütsüogo. Pai senchi magütsütetra ita asem simple imprisonment nung ayutsü.

Iba ken o ya Special Public Prosecutor L. Sashimongla ajanga benoka jembi aser Principal District and Sessions

Judge Smt. Mezivolu T. Therieh, NJS-i tai tonglokja alisang aitsü. Women Police Station, Kohima nungi Sub-Inspector Levinuo Nyuwi-i anir iba tatalokba atema bushisüngdanga aru aser parnoki kulitem bendenba den kuli agütsür 10 dang asüngdangyaogo.

Police, prosecution aser kuli agütsürtemi amalitepa yaritepba ajanga iba obendang nguogo ta Additional Public Prosecutor Abraham-i ashi.

Iba tatalokba nung tetsürlaia kanga dang tasü itta ken o angadanga aruba maparen ajak nug yaritepba atema tenüngsang agütsür ta Prosecutor-isa ashi.

Old Pension Scheme meshia car rally agi

Kohima, November 4, 2025 (TYO): Nagaland National Pension System Government Service Employees Forum (NNPSGSEF)-i Old Pension Scheme (OPS) meyipa bener arutsü takhangba agüja Kohima nung car rally ka ayongzüka agiogo.

November 4, 2025 nü agiba rally nung car sticker campaign liasü aser Indira Gandhi Stadium nungi tenzüker Civil Secretariat nung tembang.

"Onoki employee benefits atema masü saka Nagaland nung

sensotem tarutsü kümzüka ayutsü atema iba takhangba agütsür" ta NNPSGSEF President Avizo Nienu-i ashi.

"Iba campaign ya sorkar anema masü saka tang market-linked pension system anema lir" ta Vice-President Jentinochet-ia ashi.

Civil Secretariat atongba sülen NNPSGSEF-i Chief Secretary nem shidi ka agütsü aser iba nung January 1, 2010 sülen state sorkar mapa nung shimokertem atema OPS tenzüksü shia lir.

Air India Express nung Naga lanurtemanioktsü mepishir

Dimapur, November 4, 2025 (TYO): Commissioner & Secretary, Transport Department, Robert Longchari-i Air India Express dang Naga lanurtem mapa balala nung anioktsü mepishia asüngdangogo.

November 4, 2025 nü Robert Longchari den külemi OSD Transport M. Ababe Ezung nati Gurugram, Haryana nung Air India Express office semdanga liasü.

Tenati Managing Director Alok Singh aser Vice President Shashi Chetia na den senden ka amendang Nagaland aser Air India Express tsüngda tesentaktep akangshitsü atema Naga lanurte mapa balala nung

anioktsü temepishiba agütsü.

Parnokisa tourism ajungkettsü aser mapa tasentem adoktsü tebilembatem lemsatep.

Air India Express-i Dimapur tashi flight operations maneni inyakba atema pelar aser state tejakleni aotsü aser renloksü atema air connectivity ya kanga tongtipang ta Nagaland ketdangsürtemi ashi.

Air India Express-isa Hornbill Festival nung partner asütsü mulunga agizükba atema tenüngsang agütsür ta parnokisa ashi.

Senden nung telok anaprongi Nagaland state aser airline ajangzüksü atema külemi inyaka aotsü mulunga jembitep.

East Dimapur nung Christmas sobutsü indang metetdaksür

Dimapur, November 4, 2025 (TYO): East Dimapur Town Council telongtet nung aliba dokan/reju/bank ajaki November 30, 2025 matongdang Christmas decorations enoktsü tetuyuba agütsüogo.

Taküm atema official colour theme ji "Gold" lir aser iba ajanga tesangwa, azükaru aser benjung maitsü sayur.

Anungji nisung ajaki East Dimapur Town ajungalen tobur ajungtsü atema gold-coloured lights aser decorative elements amshitsü ayongzüker ta EDTC-i sangdong ka nung metetdaksüogo.

EDTC-isa nisung ajak dang tashi angatsü aser tetuyuba sülen manidakertem dak tapet mapa inyaktsü metetdaksüogo.

NE nung 'United Singular Political Entity' tentettsü sangoktsür



(Abelen nungi) Mmhonlumo Kikon, Conrad K. Sangma, Pradyot Bikram Manikya aser Daniel Langthasa.

Guwahati, November 4, 2025 (Agencies): North East nung tanishirtemi "United Singular Political Entity" ka tentettsü osang metetdaksüogo.

Parnoki "One North East" ta ser külem sangdong ka agütsüba nung party tem sabang ka nung longjemtsü shia lir.

Iba sangdong nung Meghalaya Chief Minister & NPP president Conrad K. Sangma, TIPRA Motha founder Pradyot Bikram Manikya, taoba BJP national spokesperson & Nagaland minister Mmhonlumo Kikon aser People's Party Assam founder Daniel Langthasa nungeri sign süa lir.

Telongjem nung onok tashi lir aser onok ya North East nung lanuputem lir. Political party

balala lemsar aliba nungi asenok mera agitsüla, mapang talangka asenoki asen nübortem indang kasa tebilemtsütem jembia aruogo saka sabang balala nungi jembi. Asen nübortem ola ka dang asütsüla ta onoki angatetogo ta sangdong nungsa shia lir.

North East nung alirtem ola angashitsüla, akhümtsübuttsüla aser national level nung külem yimtenren ola ka ajanga noktaksüla ta parnokisa ashi.

Iba ya mapa tuluba atema mezüngbuba mera lir aser committee ka tenteter maparen inyaka aotsü ta parnokisa metetdaksü.

Taoba lennirtemi Northeast akhüm aser maitsü atema bendanga agüja inyaka aruogo. Tanü onok külemi North East

tashitaitba aser telongjemba akümtsü atema nangzüker, ta parnokisa ashi.

Iba mapa atema committee ka tentettsü aser anogo 45 tashi parnoki asadanga sülen report ka renemtsü. Iba report nung North East region dak sendakba constitutional onüktem dena tanga tebilemtsütem adentsü.

Northeast nungi tongtipang lennir aikati iba teloktep nung adentsü shiogo saka tongti regional party temi madener.

Tang tashi nung Mizoram nung Zoram People's Movement (ZPM), Nagaland nung Nationalist Democratic Progressive Party (NDPP) aser Assam nung BJP den yariteper Asom Gana Parishad (AGP) teloktem maden.

Arunachal panchayat elections nung NSCN-i meinpronger

Dibrugarh, November 4, 2025 (Agencies): Arunachal Pradesh nung panchayat elections agitsü anogo tonga arudang NSCN-i maneni election maparen nung meinpronger.

NSCN-i Longding district kübok Wakka, Pongchau, Khakam aser Longchan circles nung yimtsüngtem dangi tetuyuba ka agütsüogo aser iba nung 'the ruling government and party' dak alia tanga party tem nungi candidate meyoxtsü shia

aliba sangdong ka intelligence agencies-i ngutetogo.

Major General Shahkoi-i agütsüba tetuyuba nung nisung kari danga iba anema inyakra tapet temerenshi alitsü aser Rs. 20 lakh senchi achitsü ta shia lir.

Iba tetuyuba ya nübortemi magizüker aser Congress-ibo Arunachal Pradesh Governor Lt. Gen. (Retd) K. T. Parnaik dang pa tebang aitsü aser fair & free elections agitsü atema mapa inyaktsü mepishio.

Tirap, Changlang aser Longding districts (TCL region) nung tangalen nungi telungpur teloktemi meinprongba ya tang tasen masü. Tesüiba nunga TCL region nung maliba telungpurtemi Arunachal Pradesh indang election maparen nung shilem agia aruogo.

Ibala inyakyim ajanga May, 2019 nung MLA Tirong Aboh aser tangar nisung 10 tepsetba dena azütokshitep tensa aika ajuruogo.

Israel Foreign Minister-i India dang "global superpower" ta ajar

New Delhi, November 4, 2025 (Agencies): India ya "global superpower" ka lir aser democracy linük ana tsüngda tesentaktep kanga akanga lir ta Israel Foreign Minister Gideon Sa'ar-i ashi.

Israel o India tsüngda defence aser innovation nungi counterterrorism aser trade nung tesentaktep kanga junga lir ta pai ashi.

Foreign Minister Gideon-i External Affairs Minister Dr S. Jaishankar den senden ka amenba sülen osangbener den jembidang Middle East tensa

mejungi liaka India-Israel tesentaktep tajungba akümer ta ashi.

"Linük ana tsüngda tesentaktep akangshia arur. Asenok tsüngda defence cooperation atema Memorandum of Understanding ka nung sign süteptsü renemer. Asenok defence, agriculture, aser economy nung tesendaktep tajung lir saka tali akangshinür" ta Israel Minister-isa ashi.

"October 7, 2023 nü Hamas-i Israel amakba anogo nung Prime Minister Netanyahu den mezüng jembirji Prime Minister

Narendra Modi liasü. India-i onok den külemi noktak aser ibaji onoki teti bilemtettsü" ta paisa ashi.

Israel-i India-Middle East-Europe Corridor (IMEC) amala maparen asentenshitsü renema lir. Iba ya New Delhi nung 2023 G20 Summit mapang mezüng sangoktsü saka rara ajanga meinyakteti aru saka onoki iba mapa inyaktsü renema lir ta Foreign Minister Gideon-isa metetdaksü.

Sangküm India nung Artificial Intelligence Summit alidang Israel-i senior level nung adentsü ta paisa shisem.

Civil Defence Master Trainers Course temogo



Central Training Institute (CTI), Home Guards, Civil Defence and State Disaster Response Force (SDRF), Toluvi, Dimapur nung anogo 21 Civil Defence Master Trainers Course agiba tatem bang sentong nung tangokba noksa ka yangi angur.

Dimapur, Yimpoksüi/Nov. 04 (TYO): Central Training Institute (CTI), Home Guards, Civil Defence and State Disaster Response Force (SDRF), Toluvi, Dimapur nung November 4, 2025 nü Civil Defence Master Trainers Course tembangba sentong agiogo, anungji Nagaland aser Manipur nungi Civil Defence officers atema anogo 21 capacity building programme agiba tatem akumer.

Iba sentong nung Dr. Thingtimla, Medical Officer, CTI menden liasü aser Manipur aser Nagaland nungi training agir temi o tatsütsü jembiba mapang state balala lokteper iba ama sentong agiba, practical training aser tanen makai 'disaster resilience' aser nüburttem renema alitsü tongtipang lir ta ashi.

Course tatem bang sentong nung Deputy Commandant General, Home Guards, Civil Defence & SDRF, Nagaland, Medozhalie Peinyu-i jembidang training agirtemi training tepiyong bendanga agütsür yimya tajung amshiba asoshi tenüngsang agütsü.

Master Trainer teinyaktsü ya

ajungben lendong mapang telangzüba agütsüba kisung masü, saka 'force multipliers' ama district aser community levels nung dangar nem training agüja ajungmesor, ta pai ashi.

Pai asoshi meblemi inyakba, lenisüba aser timtem mapang tasü ita inyaker dak Civil Defence organization metaloka lir, ta pai ashi.

Commandant, CTI den instructors aser staff temi anibelem mesasai yimya shidak amshia training ayongzüka atema pelaba lemsatsep aser iba ama training ajanga Civil Defence department maneni tashi itshitsü, ta ashi.

Peinyu-isa shilem agirtem dang iba sentong nung anguba shisatsü amshia pei unit nung awareness agütsütsü aser lendong balala agi teraksa bener arutsüba ajemtsü asoshi nüburttem renema alitsü atema awareness agütsütsü ayongzü.

Course tembangba agiba ya tatem masü saka tetenzük lir, anungji training agir temi maneni angazüka pei sempet lemsateptsü, Civil Defence indang motto "Serve Before Self" wazüka ayutsü ayongzüka liasü.

Nüburttem kumzüka ayutsü atema state tem tsünga külemi yaritepa inyaktsü aser amalitep akatsü nüngdaker, anungji nüburttenzüka aser lendong timtem ketdangzüba nung maneni teka amteper inyaktsüla, ta pai ashi.

Anogo 21 Master Trainers Programme on Capacity Building and Preparedness nungya 'emergency communication systems, air raid warning systems, collapsed structure search and rescue (CSSR), reconnaissance and damage assessment, emergency methods of rescue (EMR), medical first response (MFR), and Chemical, Biological, Radiological and Nuclear (CBRN) response' amala inyakyim awajema liasü.

Iba sentong nung Nagaland nungi Civil Defence ketdangsur 30 aser Manipur nungi 10 dena liasü. Training ya October 10, 2025 nü tenzü, koba Directorate General of Fire Services, Civil Defence & Home Guards, Ministry of Home Affairs, aser Directorate of Civil Defence, Home Guards & SDRF, Nagaland tsünga Memorandum of Understanding ka zülutepba kübok ayongzüka liasü.

Phaipijang kitsük-kirong lendong ajurur alir nem IRCS-i teyari agütsü



Dimapur, Yimpoksüi/Nov. 04 (TYO): Indian Red Cross Society (IRCS), Dimapur District Branch ajanga October 22, 2025 nü Phaipijang village nung kitsük-kirong lendong ajurur alirtem dang temeim sayua teyari agüja liasü.

IRCS Dimapur ajanga ashiba agi, iba kitsük-kirong lendong yagi kimong ti rongdoka nisung 56 dak kongshir, shirnok timba auto driver aser lenmang tezülen

chana sanger ayokertem liasü.

Iba lendong atalokba sülen IRCS Dimapur Chairman, Chandu Agarwal den team züngsem kati lendong atalokba tesem semdanga lendong ajuru alirtem den sensaksema liasü.

Deputy Commissioner, Dimapur aser IRCS Dimapur tir, Dr. Tinojongshi Chang den sensaksem akaba sülen iba lendong agi kongshir alir ajunga nem teyari oset tekeraba nung lema agütsütsü

telemtetba agi.

Iba kitsük-kirong lendong ajurur aliba kibong shia nem sorochiokdang amshiba oset-süset, hygiene kits, merila sü, yipten sü amala agütsü. Item oset ya kar IRCS State Branch ajanga agüja liasü.

Item oset lema agütsüba mapang Chandu Agarwal (Chairman), Capt. Hekiye Sema (Advisor), Lipok Ao (Managing Committee Member) aser Ajit Jain (Managing Committee Member) nungertema liasü.

PBCALongleng nung Rural Experience Centre semzük

Dimapur, Yimpoksüi/Nov. 04 (TYO): Community Care & Empowering Society (CCES) ajanga November 4, 2025 nü Customized Energy Solutions Foundation aser United Nations Development Programme (UNDP) teyari nung Phom Baptist Christian Association (PBCA) Mission Centre, Longleng nung kanga nüngdaka aliba Rural Experience Centre semzüka liasü.

Sentong akhumdong ama Deputy Commissioner, Longleng, W. Manpai-i jembidang, region shia tenüngdakba balala lir aser teyaria balala nüngdaker, ta ashi.

Rural empowerment ajungkettsü, mapa tasen abiteta inyaktsü ajungmesotsü aser aluyimba nung aser nüburttemi amshitsü atema tapet machinery

agütsütsü asoshi Rural Experience Centre ya kanga tongtipang lir ta pai ashi.

Executive Secretary, PBCA, N. Tialemba Phom-i pela agizükba o jembidang, yimdak-yimtsüng nung aliba nüburttemi nüngdakba agütsütettsüsa project tem inyaktsü tongtipang lir ta ashi.

Rupesh Badkhal, Program Manager, CESF and UNDP ajanga Rural Experience Centre indang tejangja rateta ashi.

Iba sentong nung Yingchu Phom, CCES menden liasü aser Rev. Mongvai-i sentong tenzüka sarasadem. Iba sentong nung aluyimer aser nüburttem dena liasü. Sentong tembanga sarasademba sülen machinery tem amshiyim sayuba den sensaksema mapang agia liasü.

Angh-i Tokhu Emong benjong salem lemsatsep

Dimapur, Yimpoksüi/Nov. 04 (TYO): Tokhu Emong benjongmung nung Lotha kin aser iba benjong amunger ajunga dangi tepela benjongmung salem abener, ta Nagaland Angh, Ajay Kumar Bhalla-i sangdong ka nung ashi.

Tokhu Emong ya temoatsü lia alu aroba asoshi tenüngsang

agütsüba, telungjem, akang-jungshitep aser temeim sayuba mapang lir.

Asenoki iba benjong amungdang, asen sobaliba tajung, yimsü aser takum jenjang tajung maneni wazüka yuti aser ajungketti. Tokhu Emong tanüla agi ajak dangi tepela, tesunep aser yimchiyimjung bene

Wt.Sashinungla Nathan-i züluba Enoski and Friends ta asüba kakat sayaogo



Wt.Sashinungla Nathan-i(achichi) züluba Enoski and Friends ta asüba kakat Mokokchung Times Yim o Zülur Wb.Limalenden Longkumer-i(abelen) sayatsüdang tangokba noksa.

Mokokchung Yimpoksüi/November 04(TYO) : "Enoski and Friends" ta asüba kakat Wt.Sashinungla Nathan-i züluba tanu Aor Coffee Restaurant nung Mokokchung Times Yim o Zülur Wb.Limalenden Longkumer-i sayatsüogo.

Enoski and Friends ta asüba kakat ya tanurtem azüngtsü kakat tajung ka lir kakat ya otsü den peta noksa lir aser iba kakat ya jenjang senpak 300 aser kakat ayokdak angutsü.

W b . L i m a l e n d e n Longkumer-i kakat sayatsür kelen jembidang tanü putu nung tanurtem phone amshia senti mapang tajung ajunga lalur, anungji tsüraburtemi iba mapang nungji parnok tanurtemji kakat züngdaksütsü ajungshitsü nungtaker aser iba den külemi ano parnok shisatsü renlokdaaktsütsü asoshi yimtaki anir aotsüla, ayong, arem aser tesem balala anir aotsü kangasa nungtakerta lemsatsep.

Paiza Mokokchung nung

kakat zülur aikabo mali iba mapang ka nung kakat tajung ka züluteta adoktetba aser talisa tanurtem angazükdaksütsüsa zülutetba asoshi kakat zülur nem tenüngsang agütsü.

Tangar aruagi Mokokchung ajungketa renloktsü asoshi meingyaktsü saka asenok Mokokchung nung alirtemi dang Mokokchung-ji yanglutsü, anungji asenok kati ka ajungshitepa nungitpepa libalirotsü kanga dang nungtaker ta Mokokchung Times Yim o Zülur-isa adenshia alirtem ayongzüka jembi.

Kakat zülur Wt.Sashinungla Nathan-i kakat kechi nükjidong nung zülü iba indang lemsatsep aser Miss Mokokchung 2025 Bendanginla-i kakat zülua adoktetba tenüngsang agüja jembi aser Wt.Shilula Asso.Pastor(W) MTBA ajanga kakat meshiteta Tsüngrem nem tenüngsang agüja sarasadem aser Kr.Rongsenchila Longchar-i ketdangsiä iba sentong agi.



Dr Sampada Munde shiba mezügmeshia amshiba den sexual assault asüba sülen soseta asü, la atema ochi obendang agütsütsü khanga Maharashtra Association of Resident Doctors züngsemtemi Nagpur nung longkak aitba noksa nung angur.

Maharashtra local bodies election Dec 2 nü tenzüksü

New Delhi, Yimpoksüi/ November 4 (Agencies): State Election Commissioner, Dinesh Wagmare-i Mongolbarnü sangdong ka ajanga, Maharashtra nung local body election ya shilem balala kuma lemsar agitsü, aser mezüngbuba shilem ya December 2 nü agitsü renema lir, ta metetdaksüogo.

Mezüngbuba shilem nung election ya yimti tilala yimsü asüba municipal council 246 aser Nagar Panchayats 42 nung agitsü. Election mezüngbuba shilem atema result December 3 nü sangdongtsü.

Mumbai nung ashiba den, election agitsü osangbenertem den atema polling centre 13,355 sensaksemba mapang ashiba den, election agitsü Wagmare-i, ajaki kanga yonga aliba Brihanmumbai Municipal Corporation (BMC) densema municipal corporation 29 atema election kodang agitsü iba indang memetdaksü. Paisa, zilla parishad 32 aser panchayat samiti 336 atema election kodang agitsü iba indang osang magütsü.

"Item local self-government bodies tem nung züngsem 6,859 aser Tir 288 shimtsü atema election agitsü. Iba election nung vote agütsütsü temsüa alir crore 1.7 lir," ta Wagmare-i

Osang ajanga ashiba agi, vote ya Electronic Voting Machines (EVMs) amshia agütsütsü. Election atema nomination file asütsü asoshi tatembangbuba anogoji November 17 asütsü aser scrutiny ya November 18 nü agitsü.

Nominations agintsü asoshi tatembangbuba anogo ji November 21 asütsü. State election commissioner-i ashiba agi, election ya October 31 nü tashi nung electoral rolls dak ajemdaker agitsü.

aniba asoshi NDA sorkar aija liasü. JDU-BJP+ alliance-i tetsürtem sen sen 10,000 agütsüba ajanga Model Code of Conduct (MCC) nung aibelener ta shia tashishiba agütsüogo. RJD MP Manoj Jha-i, Election Commission (EC) nem tashishiba agütsüogo. Paisa, election agitsüba anogo sangdongba den October 6 nü nungi MCC benoker liaka State sorkari beneficiaries tem nem October 17, 24 aser 31 nü sen agütsüba atema state sorkar agitsüogo.

Paisa, tanabuba shilem ya November 7 nü agütsütsü lir, koba election mezüngbuba shilem temli aser tanabuba shilem November 11 nü agitsü anogo 4 dang lia agütsütsüba lir. Jha-i ashiba agi, iba inyakyim yagi code of conduct kübok provisions aika nung aibelener. Item jenjangtem agiba ajanga Bihar nung tetsür voter tem koda tongtibang aji sayur. Bihar nung 2010 assembly elections küm nungi tetsür voter tem tebur dang nungi timba lir. 2020 küm tetsür voter 59.7%, asü aser tebur voter 54.7% dang liasü.

Tejashwi-i tetsürtem nem Rs. 30k agütsütsü nangzük



New Delhi, Yimpoksüi/ November 4 (Agencies): Bihar nung election mezüngbuba shilem agitsü lia tetsür voter tem dak rangloker nübuyimtepdar. Ruling National Democratic Alliance's (NDA)-i tawa tetsürtem nem senotsü teyari sen 10,000 agütsüba atema telangzüba agüja RJD nungi opposition party tongtiba Mahagathbandhan (MGB) indang chief ministerial candidate, Tejashwi Yadav NDA sorkari senotsü teyari agütsüba dang nungi parnoki asemsü agi timba agütsütsü nangzükogo.

Tejashwi Yadav-i, RJD-Congress+ alliance-i sorkar kümtetra parnok "Mai Bahin Maan Yojana" kübok tetsürtem indang account-i küm nung sen

30,000 yoktsü ta sangdongogo. Paisa, sen ya Makar Sankranti den denchitepa January 14 nü enoktsütsü sentong lir, aser iba ya senotsü agi kanga anünga mapang teyari agütsütsü atema lir, ta ashi. Yadav-i ashiba agi, küm pongu tsünga iba scheme yagi beneficiary tem nem sen lakh 1.5 agütsütsü.

Iba sentong ya NDA-i tawa Mukhyamantri Mahila Rojgar Yojana benokba den tetoktepba ka lir, koba ajanga tetsürtem shishilemba tilala tenzüksü atema senotsü teyari sen 10,000 agütsütsü.

Tejashwi Yadav-i NDA-i senotsü teyari agütsüba ya koba tashi ka takok asütsü aji ashishio. "Sen 10,000 agi kechi mapa tenzüktettsü kü dang shiang? NDA-i Bihar nung tetsür voter tem anisar, aser tetsürtemi iba ya meteta lir," ta pai ashi.

Paisa, tang benoka aliba scheme ka kübok entrepreneurial self-help group tem nung inyaka aliba tetsürtem nem ita shia sen 2000, sen lakh 5 insurance coverage aser loan tetemlok tai adoktsü nangzüka liasü. Pai, tangar mapa ajizüka inyakba sorkar ka

Mamata-i anir SIR anema Kolkata nung longkak ait

Kolkata, Yimpoksüi/ November 4 (Agencies): West Bengal Chief Minister Mamata Banerjee-i anir Mongolbarnü kolkata nung tang tagidak aliba electoral rolls indang Special Intensive Revision (SIR) anema rally ka ayongzüka agiogo.

Trinamool tekolakba yagi ashiba agi, BJP den sendaktepa Election Commission yagi SIR inyakyim ajanga ola madoki ochi mashi inyakyim benoker.

Banerjee-i ayongzüka rally nung nüburtem meyrejang aikati shilem agiogo. Longkak aiterem ya Red Road nung BR Ambedkar kerakyanglu amendaka aliba tesem nungi Rabindranath Tagore'er ki aliba Jorasanko Thakur Bari tesem tashi km 3.8 jaja oa liasü.

Teti ama Chief Minister ya kumba agi yangluba saree temesüng aser slippers semer liasü aser la tejakdang sür rally nung shilem agi.

Rally nung shilem agirtem jaja aoba yimtong sünga TMC pusemertemi wako aser SIR inyakyim anema placard tem bener yimyim balala ayima liasü.

Kasa mapang nung Bharatiya Janata Party (BJP)-i iba inyakyim aitsüogo aser Opposition lenir Suvendu Adhikari-i iba sentong ya "rally of Jamat," ka lir ta ashiba den iba yagi India temzüng ozüng anema inyaksangshiogo, ta shisem.

Maneni West Bengal BJP Tir Samik Bhattacharya-ia, Banerjee-i longkak aitba sentong ayongzüka agitsü melena la tebilemba ya Supreme Court dangi abentsüla, ta ashi.

"Bengal nung temzüng ozüng kecha mali," ta pai ashiba den, state nung tang demographic temelenshi adokdar ta shia TMC sorkari Rohingyas nungertem voters list nung züngoksemtsü ajungmesoba atema aitsüogo.

"Nüburtemi Rohingya nungertem voters list nung züngoksemdaktsüner asü masü?" ta pai asüngdang.

Iba longkak aitba sentong ya SIR exercise tanabuba shilem den denchitepogo, koba tang West Bengal densema state aser Union Territories 12 nung benoka inyakdar.

Voters list nungi duplicate, asürtem, tanga tesemi or alirtem mesüra temsüa maliba voter tem agintsü atema SIR ya benoka inyakdar.

Ajisüaka opposition party temi ashiba agi, iba inyakyim ya lokti nung nübu agi ajema alirtem aser opposition pusemertem agintsü asoshi amshir.

Bihar nung iba inyakyim benoka inyakba mapang mepetmesü tulu adokogo aser nisung lakh 68 dak tema tenüng voter rolls tatembangbuba nungi aginogo.



Mongolbarnü Chhattisgarh kübok Bilaspur station anasa passenger train kati khu abenba train ka dak atsükba sülen nisung ti asü aser 14 yirua liasü.

Telangana: Azharuddin nem Public Enterprises Dept. agütsüogo

New Delhi, Yimpoksüi/ November 4 (Agencies): Cricket asayar aliba nungi yimden yimsüsür akümsang Congress lenir Mohammad Azharuddin, chief minister Revanth Reddy indang cabinet nung minister ka akümba sülen anogo ishika lir Mongolbarnü pa nem Telangana nung tongtibang portfolio tem lezmütsüogo.

Azharuddin nem Public Enterprises department den Minorities Welfare department agütsüogo, ta chief secretary K Ramakrishna Rao-i metetdaksüogo. Public Enterprises department ya taoba mapang CM-i bener liasü.

Taoba mapang India team cricket captain ya October 31 nü cabinet nung züngoksema pa ya minister 16buba aküm. Telangana nung ano minister menden ana tazüng lir,

kechiyong assembly tashi dak ajemdaker assembly nung minister 18 shimtsü melar.

November 11 nü Jubilee Hills bypoll agitsü lia Azharuddin shimba ya kanga kümdanga bilemdanger jenjang agiba ama bilemer. Iba menden ya kanga tongtibang aser Muslim nung voter lakh ka dak tema lir asü nung parnoki result melentsütsü koka lir.

BRS MLA Maganti Gopinath June ita asüba sülen iba menden atema by-election agitsüsa aküm.

Temetettsü kaji Azharuddin 2023 küm election nung Jubilee Hills nungi toktep saka tamakok angü. Pa ya August ita Governor's quota kübok MLC ama nominate süa liasü.

Ajisüaka pa shimba ya Governor Jishnu Dev Varma-i tang tashi temelaba agüja mali.



TIR YIMYIM YIMOBILEM (EDITRIAL)

DIMAPUR WEDNESDAY, NOVEMBER (YIMPOKSÜI) 05, 2025

TGZP mapa ya junger

Ao lima nung aliba ayong tulutiba aser talangtibaji tzüla (Dikhu) ya asütsü saka junger-majung kaji iba ayong ya asen lima tiyong nung ayimer masü saka iba ayong yagi tesem aika nung tangar kintem denang arr ladanger. Ajisüaka, ayongbanglen tangatettep tajung nung tzü kibur yimtsüngtem longjemer Tzüla Green Zone Project (TGZP) tenzüka tzü aser mopong memenendaktsüi wazüka ayuba dang masü saka ayong nungji ango mesüba sentong dena ayongzüka akatsüsa inyaktetba mapaji asenok ajak asoshi takok osang tajung ka asütsü aser iba ama sentong tajung apiteta inyaktertem nem tenüngsang agütsür. Atangji, iba ama sentong ya ajanga tangar danga pei lushi nung aliba ayongtem memendendaktsüi tajangzük mapa nung amshitsüsa wazüka ayutsü asoshi ajungshir. Asenok aika dak TGZP purtem dak aliba tangatetbaji mali, anungji janaona ajak ayong nung touka yutsür, anungji ayongji jana ona tokkendak tesem amai ka dang kümer, talisa polythene aser plastic agi ayong nungji taküm sangnu kecha taküm ali majung kümdaktsüogo. Aji dang masü saka ano tesem aika nung ali telong nung aliba mijang atuba agi alijak dang masü saka ayong nung ayimba tzü dena menendaktsüba agi, tsürabur senmang tajung teronem menema tajungba tajungba mesemteta amshitsü melen aasenoki asenoksasa ayong aika menendokogo. Itemji asenoki kanga mebilemdangi inyakba tesusatsü mapatem asütsü. Aji oda, mijang atuba agi alushi aika nung alua meyimtetsüsa raksa, ayonga joko tamshi majung menendok saka mijang atuba agi takar akümba aser lokti asoshi mapa tajung inyakbabo tilakata mangur. Ibaji asenok rongnung shisamaka mapa nung toktepba tamashi mapa ka asütsü. Ibaji asenoki rajemtsüla aser memenudang asenoki raksaa toktsüba ali aser ayongtemji tasen küma yanglushi tenzüksüla. TGZP purtemi inyakba mapa ya ayong nung tzü aser taküm sangnu wazüka ayuba dang masü saka iba Dikhu tzüpaktem ya memenui alima tesem ajaklen nungi raliwalirtem adenshia amongdak tesem tajung ka akümtsü, anungji yangji lisopurtem tajangzük angutsüsa mapa aika adoktsü. Iba teimla aser tangatetba nung Nagaland ajunga ya yimti ka amai kümer 'Integrated Tourism Circuit' ka küma yanglu nungbo, hornbill benjong mapang raliwalirtem Kisama tashi dang arur meyipa oa adokba ya masü saka Kisama nungi Wokha ajanga Mokochungi arutsü aser Tzüla nung ango mesüa monger Saramati tashi orr ano ilen nung jagi Longwai aotsü aser ilen nung jagi Molungkimong aser Mulongyimseni meyipa arutsü aser Impuri atutsü aser Mopungchukit, Ungma aser Longkhum semdangtsü ta alima tesem balala nungi arur raliwalirtem senzüba kisüng jagi asen nübortem aika tajangzük angutsü. Ibaji asenoki inyaktettsü. Iba nükla nung asenok yimtsüng shia nung raliwalirtemi reprangdangnütsüsa tesem mesemteta yutetra aser raliwalirtemi anganütsüsa aser angazüknütsüsa otsü tajung rizünga yutetra, raliwalirtemji asenok yimtsüngtem nungang arua anenzüktsü, kechiyong tanü asüng bendanglen nungi arur raliwalirtemi yimti tulu nung manener saka yimtsüng nung yimtakirtem den külemi otsü atonga mongner. Item raliwalirtem jagibo arem nungang mongner aser longpang lungren nungang senzüner aser tenemi tuner. Aji oda, chiyongtsüa parnoki achiba chiyongtsü masü saka asenok yimtakirtemi achiba chiyongtsütemang chidanga mongner. Parnok asoshi itemji asen-alu aser jangratemtsüka aser asenok asoshi sen aadak mapa tajung ka asütsü. Ibaji angateta kodang asenoki inyakdir, asenok yimtsüng ajunga ya 'Tourist Spot' kümadoktsü aser tangar sen bener asenok alidak asen yimtsüng, asen lu aser asen sobaliba reprangi arutsü. Item ajakji asenoki asen lushi nung akaba ayong, arem aser otsütem memenendaktsüi wazüka yutetba nungi tenzüksü. Itemji ataloktsü atema asenokia TGZP purtem mapa nungi angazüka, pei pei lushi nung Tsüngremi moatsüba tenem, ayong aser arem ajak wazüka ayuba dang masü saka tajungba küma anepalua inyak tenzüksü ajungshir.

OLEMSABANG

KITA CHIR

~ S.Aosüngküm Ozüküm

(Iba Yimdangjem otsü ya Tir Yimyim aser Bookipedia nati ayongba toktep nung Tanabuba takok jenjang anguba liasü.)

(Yashi adok nungi...)

Hauni, temeimtsü ulura, anojungi tanur abenbaji dang masü tsüraburi kidang nungi arizüka yokadok, ano medenser kinungtsü alir ka den raksaba maaksü khuretji benloker ammag sangwa tebandang makai nüktsü agi naro küma anur la mulungjang tatayuyu agi süngogoni. Kechiaser la yimti tezülen Ami ki nung mejangdagi. Ammag nung lar ki kilem ateta petinu aser ita sangwa ngua mejangdang lai ashi, "Tsüraburi sentokba taküm ka tejashi aser shisabulu koda tulu" ano laisa ashir, saka ya teti asoshi masü khenpika dang lir süitema aotsü aser tesünep tepela agi melentsütsü ta teimla o maneni jembir. Yamaji anogotem süitema aodang la temang taretba akümer, tetsüng teben karakara olioratsü kanga saaka kümdagi, oda kodakang ajia melitet tangar lu nung aahyanga chiyungtsüba dak alaka danga lenmang kecha mali, aji dang masü la sasa la mang anepalutsübajia kanga temela masü kümogo aser joko la tongtonglatsü atua khen khenbo alima nunga melinür ta ashir. Saka lai ashi, "Nisung ya pei mulungba nung poktet masü, saka ajak madak "Teyanglur ka lir. Pai ni shisatsü aser kechisarena ajak nung okrongba ngudagi, ano laisa ashir, "Iba tanur tebur süshia tetsür süshia kechi moatsüdir küna yamai tetibo alaashia metoktsütsü ta ni amanger. "Ni Paji Mangur, saka Pa ajak yanglusang aser ajak poktetdaksüsang lir, anungji ni pa dak imlar". Aria bilemstükaji, Yimtina tebui aritokba anogo nungi tang tashi la medemer aser kinunger shingaia la den khuret lemsatapa nüngtakba agütsüra mali, saka lar ki anasa sensaker kibong ka nung ajemalu tetsür chanu kati la timatempa ngua kanga nendaka yarir. Iba tetsür jagi ashi, "Oya, na temulung ajema tekümma ozü makamaiterji rongsenbo magütsütettsü, saka nübu ka agibo ni na akok tashi yaritsü" ta ashidang la mulungjang anisüngzük tulu angu aser iba aonung ayipjanga mejang. Iba aonungji lai pungmang ka pungmang, pungmang nungji lai tetsür chanu teyira ka aso aser la tain küma atudang lokti tulu kati la nem narozük azükja angu. Anungji pungmang nguli la aoksar saak aser khenbo tangula junga mesashiteti aküm. Lai saaker pungmangji kanga metetnua shisadanga aodang, la mulungjangi arubaji tanurji sor külen anogo ishika tsüngda asütsü aser temeimer kari la nem naro agüja tatembang tetushi agütsütsü sayur ta ratet. Anungji ano iba pungmang nungji temulungjang ajak anokshia oa aoksar teimla makai alidang, kiyong nung alir tantsür ka arua sensak sema amen, idangji Yimtinai la pungmang to tatongi rasaa ashitsü tenzü aser shisabulua nüktsü aidokba ngua tantsür jagia kanga aria bilem. Iba sülen shisataka tantsür jagi ashi, "Ne Jala Yimsüsüba Menden Temaba Nung Mener Alima Ajaki Tushiba Maginüi Na Kechiba Ajeper? ta la pungmangji tajungleni rateta ashiba sülenang la mulungjang anisüngzük tera angu aser "tzü jaa alidak tzüzü shiloktsü ama züp ta süngjemsüngjema aküm" saka lai iba miim o aser pungmangji shinga danga meshii la mulung nungang rizünga ayu.

Tapu - Trok

Tanur Asotsü Mapang Atong : Ajaki mulungtepa kibong kümer yongyaseta liaka jala jabaso mesosemstüa akok aser shingaia memeteti pei sasa ayongteper kibong kümaka chirnur temoatsü nguyonga aotsüjia shingaia metet. Kechiyong iba temoatsü yabo temalen nungi arur aser tiatsübai shir nem agütsüdir parnoki angur. Yamaji Yimtina kita chir ka asotsü shirang tenzü. Oda tebui amokmeren tulu liaka koda masüji tetsüi kiyongtsür teti nu sotsür mongin ka anisemer parnok ishikadi la anepalu. Alima nung nuso ashiba ama tanga timtem kecha mali ta jembir, yamaji temeimtsüka la kanga kangshir, anungji iba ama timtem mapang nung tebusang süoshi ka amongloktsür ta jembia aruba ama parnoki inyak. Iba sülen mapang talangka melii lai pungmang nung anguba ama to tetsür ka aso aser mapang tatsüka tsüngda iba osang temai adoka prokshi. Joko tepenjem aier aser takar jala apetasong maket aliba to menüdong ka ama aküm, kechiaser lai "Kita Chir" ang ka aso ta tenükdang mait aser jenjang makai jembir. Iba aonung par yimti nung nanüng ola tulu liasü aser jala tenüngji komala ka jatsütsü? ta ataa alidang tanur tebu jagi; Jungaka mejungaka nia yimsoyimlir chanu, anungji ozü jala tenüng "Yimkümti" ajatsü ta ashi. Iba tetezü par yimji tebou nungeri aküm aser tanü tashi kechi tensa arudir aruaka ajak tizükteta aliba naroküm tamaren tenüng tuluji aja.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Trump-i amokmerenba atema Nigeria arogo lenirtem obang mapur



Abuja, Yimpoksüi/Nov. 04 (Agencies): Khristanpur reshikangshia amshiba mechi "US list of countries of particular concern" nung Nigeria tanaben züngoksemba atema arogo lenirtem obang mapur aser Africa nung nütsüng yongsük timtiba aliba linük nungya kanga sashia o inteper.

Khristanpur kumzüka ayutsü atema US Tir Donald Trump-i iba osang ya October 31 nü sangdong, kong tamangertem samatsüsa timtem lir ta ashi.

Tamangertem tepsetba sorkari manendaktsütetra Nigeria nem teyari agütsüba ajunga anentsü aser mitkar mapa tenzüksü ta pai amokmerena liasü. Mapang tatsüka lir paisa Department of Defense, koba dang pai Department of War ta nüngja agütsü, parnok dang mapa inyaksü atema renemtsü ashi.

"Khristanpur meyirijang aika tepseter. Iba ama nisung jenti tepsetba ya radical Islamists mapa lir," ta tiri pa indang Truth Social nung lemsatep.

Nigeria nung aliba Khristanpur kari iba mera pela agizük, aser kari iba ya ajanga linük nung tamangba yimsü balala külemi aliba nung timtem ajurutsü ta ashir, kong Khristanpur aser Muslim nunger kasashi lir.

Nigeria northeast tsütsü Sokoto indang Bishop Mathew Kukah-i kanga kumdanga iba sangdong pela agizük.

"Ni iba sangdong ajunga shisadangtsü mapang mangu, saka asenoki iba nungi adokba angutsü asoshi atatsüla. Asen linük aintsü atema iba nungi kechi adoker, aji repranga atati," ta Bishop Kukah-i November 2 nü ashi.

Nisung million 230 dak tema aliba Nigeria nung tamangba yimsü yagi linük ya ana kuma sadanger, kong Muslim nunger linük north tsütsü timba alir aser parnok ya shilem 50 nungi 55 tsüngta lir aser Khristanpur ya linük south len alir aser shilem 35 nungu 50 tsüngta lir.

Aid to the Church in Need ajanga October 21 nü major study - Religious Freedom Report - indang benoka jembidang Bishop Kukah-i Nigeria ya particular concern linük ta tanaben nüngja agüütsüba anema jembi aser iba

mera yagi linük nung tamangba yimsü temeden atema tebilemstü bentettsü asoshi sentong tenzüka aliba nung tetsükdaktsü ajurutsü akok ta ashi.

Iba nüngja tanaben agütsüshiba ajanga linük telungzük nung tamangba yimsü balala tsüngta jembishinütsü tasakba akumtsü ta bishop-i ashi. Nüngja tanaben agütsüshiba ajanga mepetmesü tali akumtsü, temulung melemtep adoktsü, tamang makana aser tetsübo kijiba lapoktsü aser mapa tamajung inyaker temi mashi lenmang nung itemji amshitsü ta ashi.

Ajisüaka Diocese of Enugu nungi Nigerian Fidei Donum putir Father Augustine Anwuchie-ibo tang aliba sorkar ya ali tashi linüki kiralongra anema raraba nung kodanga takok mangutsü ta ashir.

Iba putir ya tang Diocese of Maradi, Niger nung missionary ka ama inyaker aser paibo tang aliba Nigeria sorkari ruling All Progressives Congress party telungzük nung kiralongrar adokdaktsür aser yimten yimsüsütsü, parnok takum alitsü, tetsübo aser rongrong adokdaktsütsü asoshi hadir ka ama amshir ta ashi.

"United States aser danga linüktemi Nigeria nem pari inyakba nung telangzüba

magütsüdaktsütetra, Tinubu aser pa sülen anidaker temi maneni Nigeria nungertem kiralongraba nem bendanga agütsütsü, aser taruba kümsük asoshi tasa yanglutsü," ta pai November 3 nü OSV News dang ashi.

"Linük aronger aser lenirtem milak nung tsüngsanger," ta pai ashi.

Nigeria north len Islamist telungpur telok aika lir. Telok tulutibaji Boko Hara maser Islamic State in West Africa lir. Tawa kiralongrar telok tilatem pokteta pei litsü-lika atema rarar. Fulani shiruru metsürtemia Nigeria indang Middle Belt region nung timtem jenti agütsür.

Iba belt nungya Khristanpur aluyimertem timba lir. 2019 aser 2023 tsüngta Khristanpur asüba shilem 55 shi Fulani dak tai tonglokja lir.

Catholic nungeri ajungmesoba NGO, Intersociety ajanga ashiba agi, Nigeria nung anogoshi Khristanpur 32 tepseter. August ita report adoktsüba nung 2025 küm tenzüker mezüng anogo 220 tsüngta Nigeria nung Khristanpur 7,000 tepset ta shia lir.

Boko Haram teloki 2009 küm nungi Sahel ajunga nung caliphate amenoktsü tebilemba nung nisung tepseta aruba mapang Nigria nung Khristanpur 125,000 aser moderate Muslims 60,000 tepset ta parnoki ashi.

Tang Nigeria nung atalokba ya region kar nung mapang ka Khristan yimsü agi sünga aliba khen lir tazüngla akumba den mesükteper lir, ta Intersociety indang director Emeka Umeagbalasi-i ashi.

"Iba yimya ya manenra, Nigeria nung 2075 tashinung Khristan yimsü samatsü," ta Umeagbalasi-i ashi.

Kerala nung bishop tepsettsü amokmerenba bushisüngdang

Thiruvananthapuram, Yimpoksüi/Nov. 04 (Agencies): India linük south tsütsü Kerala state nung par sasa Islamic Defence Force of India ta ajaba telok kati Catholic bishop ka tepsettsü amokmerenba indang police temi bushisüngdang.

Thamarassery diocese indang Bishop Remigiose Inchananiyil dangi iba amokmeren shiti ya Malayalam oshi nung zülur pa indang office tonga bener arutsü, ta iba diocese nung ketdangsür kati ashi.

"Takum agitsü amokmerena züluba shiti ya October 31 nü Bishop's House dangi bener arutsü. Iba shiti ya bushisüngdangtsü atema Thamarassery police

nem agütsüogo," ta Father Sebastian Kavalakkattu, diocesan chancellor-i ashi.

Iba shiti nung kechi zülua ali, ajibo pai mashi aser bishop ya tang bendang lima nung lir ta ashi.

Ano arogo ketdangsür kati, state nung taruba küm state election agitsü lia Khristanpur aser Muslim nunger tsüngta mangatettep adokdaktsütsü nükjidong nung iba shiti ya zülü mesüker, ta ashi.

Iba shiti zülusang tenüng ya Abdul Rashid agüja lir, aser police temi kanga junga bushisüngdangba sülen ang tejangja metettsü, ta ketdangsüri ashi.

Arogo indang osangtem ajanga ashiba agi, shiti nungya sorkar aser semi-government mapa nung

ANOGO ABEN TSÜNGREM DEN

Külemtsü Renemba

Asen taribi merüktetter aser meshitetter ama pa amentsü aser Levi chirtem meshitettsü.

Pai parnok hon aser taribi mesüka merüktettsütsü, anungji Kibuba asoshi parnok temeshiba nung tenla bener aruba nisungtem akümtsü. (Malaki 3:3)

Asen tekülemba ajungmajung mazüngi inyakba agi masü saka jakla dak nungi metettsü. Arogotemi ken tajung, ki tajung, sayutsüngir-i koda junga jembitetter iba ajonga tekülem ajungmajung bendanger; saka asen temulong telong nungi Tsüngrem den tesentaktep junga melira tanga ajakji yimsü sayisabong dang alitsü. Levi nungerji par mapang nung tekülem lennir liasü. Parnok mapaji nubur tenung nung tarongba tenla agütsürtem. Tsüngrem i ashi parnok tekülem tenla magütsüdang Hon aser taribi merüktetba ama tamasa meshitettsüla. Memerükba ajak mi agi ama rongdoktsü. Tenung agi dang yimsü mapa inyakba aser tenzükbaji temeshi Tsüngremi magizüker. Tanü aseni tema osettem nung rangloka külemer, saka shitakba tekülemji asen taküm telong nungi dang lir. Aseni asen tama Tsüngrem nem memeshitetdaktsüra, asen tekülemba nung Pa malitsü.Asenok mulongsentsü memerükra aseni tenla agüjaka Tsüngrem tsüngdang tagizüktettsü masütsü. Tekülemdak tenla ki nung atenba agi dangbo Tsüngrem den lungjemer ta ashitsü makok.Na tekülemdak temolong mesüi lira tanaga masü saka nü mulongjang tamasa reprangang aser Tsüngrem nem aji meshitetdakjang sura nai Pai mulongba ama jangratema temoatsü ngua külemtettsü.

Muslim nunger asoshi shilem 70 meshir aser state indang revenue shilem 90 shi Muslim nungeri lir ta shia lir. Kerala nung nütsüng yongsük 33 million aliba nungi Muslim nunger shilem 26 shi lir.

Shiti nung sorkari yariba school tem nung Muslim nunger kaketshir temi parnok tamangba yimsü nung külem-keja asütsü atema facilities meshi aser Khristanpuri Muslim nunger leper li agia tekülem ki aser reju balala yanger ta tai tongloktsü.

Shiti nungya state nung tawa Catholic nungeri lapokba school ka nung hijab indang mangatettep adokba athishia lir, kong Muslim nunger kaketshir ka tekolak nung sü inoker class nung

adentsü memela. Tetsürla tsürabor temi ken o agienba sülen iba ken o ya Kerala High Court nung angatettepa liasü. Iba shiti zülur jangjatsü asoshi bushisüngdangba mapang lir ta police temi shiogo.

"Onoki iba ken o bushisüngdang. Yariteptsü atema forensic aser cyber intelligence team tem aniokogo. Bushisüngdang renemba sülen osang tejangjaba angutsü," ta ashi.

Iba sülen Bishop's House aser anasa arogo indang reju tem nung security tesashiba kumogo.

Kerala nütsüng yongsük shilem 18 shi Khristanpur lir aser parnok dang Muslim nunger timba aser Hindu nunger shilem 54 shi lir.

Peru-i Mexico den tesendaktep mayutsü lemtet

Lima, Yimpoksüi/November 4 (Agencies): 2022 küm sorkar coup asütsü merangba atema tang ken o bendanga aliba taoba Peru Ato Kilonser nem tejenokdak agütsüba atema Peru-i Mexico den diplomatic tesendaktep mayutsü telemtetba agiogo.

Taoba Ato Kilonser Betssy Chavez, shiba Tir Pedro Castillo kübok tenzüka liasü, la Peru nung Mexican Embassy-i jena aoba sülen Hombarnü iba osang ya sangdonga liasü.

"Betssy Chavez shibai taoba Tir Pedro Castillo den külemi sorkar coup asütsü merang, la nem Peru nung Mexican Embassy nung tejenokdak agütsüba onoki tanü osang angazükogo," ta Minister of Foreign Affairs Hugo de Zela-i osangbenertem den sensaksemba mapang ashi.

"Taoba mapang aser tang sorkari Peru telung ken o nung jushiba apir Peru sorkari tanü nungi Mexico den diplomatic tesendaktep mayutsü

telemtetba agiogo," ta paisa shisem.

Ken o dak sendakba nung Mexico-i kecha telangzüba magütsü.

Chavez okatsür Raul Noblecilla-i, local radio station RPP dang ashiba agi, pai pa indang client nungi anogo ishika kecha osang mangashi, aser la nem tejenokdak agütsütsü asoshi mepeshi memepeshi iba indang pai kecha memetet.

Chavez, shiba Castillo indang cabinet nung Minister of Culture liasü, la ya 2022 küm November ita Ato Kilonser asütsü shim. Tir aser Congress na ita aika atsütepba sülen la shima liasü.

Castillo, shiba taoba mapang school tesayur aser trade unionist ka liasü, pa dang ya Peru indang mezüngbuba sensaker Tir ta ja liasü, saka pai Congress loksatsütsü merangba sülen mapa nungi anentsü.

Iba sülen Lima aser Mexico na tesendaktep mejungi aküm.

Mapa nungi anentsüba sülen Castillo ya tejenokdak bushia Lima nung Mexican embassy-i oya aliba mapang apu, aser sorkar anema nokdakba aser pa tashi alia amshiba atema aija liasü. Pa den külemi Chavez-a aija liasü.

Castillo kinungtsü aser tanurtem nem tejenokdak agütsüba atema 2022 küm December ita Peru-i Mexico indang ambassador mintok.

Taoba Tir aser Chaves na taküm March ita okadak nokdakogo.

Castillo nem preventive custody agütsüogo aser Chaves ya September ita bail nung chioka liasü.

Castillo-i Congress loksatsütsü atema sentong yangluba nung shilem agiba atema prosecutors temi Chavez ya küm 25 tepuokdaki yokner. Parnokisa Castillo küm 34 tepuokdak ayutsü benokogo. Ajisüaka tenapronglai iba taitsüba ya magizüki arudar.

Indonesia kübok Papua nung tzümetsüng agi nisung 15 asü



Jakarta, Yimpoksüi/November 4 (Agencies): Indonesia nunger ketdangsürtemi Mongolbarnü ashiba agi, Papua tesem nung ayong ka ajangba mapang nisung 15 tashi tzü agi aponger oa süogo. Asürtem ya timba tanurtem liasü.

Kasa mapang nung ano tanga yimtsüng ka tzümetsüng agi kongshiba sülen tanur ti tashi samar bushidar, ta ketdangsürtemisa metetdaksü.

Iba lendong ya Nduga kübok kinük nung aliba Dal yimtsüng nung Honibarnü ataloka liasü, kong tzünglu kanga sashia aruba ajanga ayong moshia yima arishi küm ti nungi 17 tsüngda alir tanur 15 tashi aponger ao, ta local police tekolakba Alfredo Agustinus Rumbiak-i ashi.

Paisa, tasüamang kabo ngutetogo aser ketdangsürtemi tanungba tasüamangtem bushidar, ta metetdaksü.

Kasa anogo iba yimtsüng anasa aliba yimtsüng ka nung tanur ti aponger aoba sülen

police temi parnok maneni bushidar.


Tanurtem ya pei tsürapurtem den tanga yonga ka adena aoba mapang tzü tesashi agi parnok aponger ao, ta Rumbiak-i ashiba den tenem lima nung asünung tzü agi aponger aoertem bushitsü kanga tasak lir.

Kasa mapang nung Indonesia indang disaster mitigation agency-i, Papua kübok tesem aika nung tzünglu kanga sashia arutsü imla aliba mapang ano tzümetsüng tali arutsü aliba atema renema atatsü tekümdangtsü metetdaksüogo.

Rumbiak-i ashiba agi, Nduga tesem ya mepetmesü nung aliba tesem ka asüba ajanga teküzmükba maparen inyaktsü tali tetsüdaktsü adokdaksür.

Dutch nunger yimsüsüba tembangba sülen Papua ya Indonesian tawabangba küboki aiba sülen Papua nunger telungpurtemi nüjiso atema rara arudar.

Taoba US Vice President Dick Cheney süogo



Washington, Yimpoksüi/Nov. 04 (Agencies): Taoba mapang United States indang tatong tir inyaka alisang Dick Cheney arishi küm 84 nung süogo.

Republican telok nungi yimten yimsüsür Cheney ya 2001 nungi 2009 tashi tir George W Bush indang deputy liasü, aser pa asüba osang ya par kinunger temi Mongulbarnü sangdong ka nung metetdaksü.

"Küm 61 tashi pa kinungtsü asüla Lynne, par jala Liz aser Mary aser kinungertem pa den lia pa asü," ta sangdong nung ashi aser pa ya pneumonia aser cardiac aser vascular disease agi asü ta ashi.

"Dick Cheney ya nisung tajung ka liasü, shibai par tanur aser semchirtem dang asen linük meimtsü, tasü ita, akum keta, temeim nung aser dangar dang aria bilema alitsü sayu," ta par kinungeri ashi.

Ajisüaka US aser linük balala nung nisung aika atema Cheney ya yimten yimsüsür tesashi ka liasü, shibai tatong tir arla alema oa Bush administration indang "war on terror" ketdang asü aser Iraq

amakba nunga shilem tulu agia liasü.

Iraq ket nung 'mass destruction' hadir jenti aliba ya lendong tulu lir ta Bush administration ketdangsür temi sashi-sashia jembiba rongnung Cheney ka ya liasü. Ajisüaka iba amala hadir kodanga mongutet.

Ajisüaka iba mapang itdangiterba nung ajemdaker Iraq amaktsü telemtetba shidak agi, ta Cheney-i ashi aser iba ya ajanga yimsüsüba menden nungi Iraq tir Sadda, Hussein atsüngdok ta shia liasü.

US yimtenren nung tebu aser jabaso tir inyakba nung Cheney ya ketdangsür ka ama liasü.

Tir George HW Bush kübok Persian Gulf War mapang Cheney ya defence chief liasü aser iba sülen par jabaso indang tatong tir ka ama inyak.

Pa US indang tatong tir inyakba mapang tir indang tashi ulushitsü asoshi kanga sashia nokdak, koba Watergate scandal sülen tashi samaa aor ama bilem, koba ajanga mapang ka pa dang temaba nung aliba Richard Nixon mapa

nungi anentsüsa akum.

Pai tatong tir indng office ulushia national security team ka lungjemdaksü, koba administration telungzük nung tashi tiyongtsü ama liasü.

Pai Secretaries of State Colin Powell aser Condoleezza Rice densema Bush administration nung lenir aika den meputep liasü aser kiralongrar südi ta temulung melemi alirtem asüngdangyaba yimya ulushiba bhukuma nodak.

US Senate Select Committee on Intelligence aser UN special rapporteur on counter terrorism and human rights ajanga item yimya ya dang reshikangshi ta aja.

Tatong tir mapa yutsüba sülen Cheney dak Tir Donald Trump-i tenük yok, kechiaser par jala Liz Cheney ya Republican anemer tejangja nübu ka akum aser yimsüsüba menden nung alitsü meranga Trump-i 2021 küm January 6 nü Capitol nung rongrong adokdaksüba kanga junga asadanga liasü.

"Asen linük indang küm 248 puti otsü nung asen republic asoshi Donald Trump dang tebilemtsü tulutiba nisung kata meliasü," ta Cheney-i shia liasü.

Pa Republican süaka 2024 küm US tir elections nung Democratic candidate Kamala Harris nem vote agütsütsü ta ashi.

Cheney arishi talangba ka temulungjang nung timtem ajurua liasü, aser arishi küm 37 nung mezüngbuba 'heart attack' liasü. 2012 küm pa indang heart transplant ka asü.

Putin-i December tashinung Russian rare earths agitettsü tuyur

Moscow, Yimpoksüi/Nov. 04 (Agencies): Russia Tir Vladimir Putin-i pa indang cabinet dang December 1 tashinung rare-earth minerals agitettsü asoshi sentong yanglutsü totuyuba agütsüogo, kechiaser iba oset ya modern technologies nung amshiba mechi alimai tenük tali yoker aser China nungeri iba market amokbanger aliba nung metaloka aliba ajemtsü tejangraba lir.

Minister tem nem mapa balala nungloksüba Kremlin website nung adoktsüba nung, Mongulbarnü Putin-i cabinet dang China aser North Korea den Russia indang arütsülen transport tesendaktep yanglutsü asoshi mera agitsü tuyu.

Rare earths ya smartphones, electric vehicles aser nok-nü nung amshir aser international trade nung kanga tongtipang kumogo.

April ita US Tir Donald Trump-i Ukraine Tir Volodymyr Zelenskyy den tezüngzüktep ka zülutepba nung US-i aginüba ama Ukrainian minerals deals tasen yanglutettsü, linük yanglushiba nung senotsü indoktsü züngzüktepa lir.

Russia-i rare-earth projects nung US den külemi inyaktsü jangrar ta ashi.

March ita Putin indang investment envoy Kirill Dmitriev-i Russia aser US na Russia nung rare-earth metals projects atema jembishinü tenzükogo ta shia liasü aser US company karibo iba project inyaktsü jangraba lemsatepogo ta ashi.

Ajisüaka Ukraine nung Russia indang rara atemtsü asoshi terenlok maliba ajanga US aser Russia tsüngta teimla soita lir.

Alima nung rare earths ya China-i amokbanga lir, aser taküm US tariffs nung tayang kepzüka rare earths exports nung tenokdangba agütsü.

Putin totuyuba ya September ita Vladivostok nung Far Eastern Economic Forum nung pa adendang 'action points' tem yangluba nungi agizükba lir, kong Russia indang rare earths sentong indang tejangja shia mali.

Russia nung rare earth metals ya 3.8 million tonnes lir ta US Geological Survey ajanga asadangteta lir, saka Moscow-i iba dang tali lir ta asadangteter.

Natural Resources Ministry ajanga ashiba agi, Russia nung January 2023 tashinung rare-earth metals tabu 15 lir aser ajak meyokteper 28.7 million tonnes lir.

Alibayim dak All Nagaland Volleyball Championship asayar



Wabang Kichui All Nagaland Volleyball Championship tenzükja mezung asayatsupur den salemyonga aoba mapang

Mokokchung, Yimpoksüi/ November 4 (TYO): LL Group-i ayongzüka aser NAKZOER teloki achayanga Aliba yim dak All Nagaland Volleyball Championship "in pursuit of excellence" omen dak rangloker 4th November, 2025 nü Mokokchung Municipal Council, Councilor, Wabang Kichu-i meraketa tenzüksüogo.

Iba asayamung nung Nagaland tesem balala nungi telok 18-i shilem agitar. Pool pezü küma lemsa aser Pool 'A' nung - Changtongya Volleyball Association, Fablet United Dimapur, Fly High Tuensang, Twin Brothers & Spadroon Club. Pool 'B' nung - Vision Niuland, Spike Tribe Pughoboto, Friends Club, Set Stars Dimapur & ??-10 ?hm. Pool 'C' nung - Blind Spikers L.L Group Dimapur, Tongden Club Chungtia, Town Club Mba & Ace Club Dimapur. Pool 'D'

nung - Defying Gravity Ghaspani, The Chester Club Akuluto, Street Boys Wokha & The Rebels Settsü nungertem lir.

Iba asayamung shir teloki bendir champion nem senpet sen 1.2 lakh agütsütsü, tanabuba, tasembuba aser pezübuba jenjang angur nema sen 80,000/-, 60,000/- aser 40,000/- senpettsütsü. Iba den ano nija senpet - Best Spiker, Best Setter, Player of the Tournament aser Emerging Player of the Tournament nungertem shimtsü. Osang tajung kaji knockout round nungibo 'player of the match' shima senpettsütsü, ta angazüker. Nagaland nung volleyball tournament asayaba tulu rongnung ya-a ka asütsü.

Tetushi tesemdanger MMC, Councilor, Wabang Kichu-i jembidang, asayar kaji tournament mapang dang masü

saka anogoshi shikaba (practice asüba) den maneni meranga asayatsü nüngdaker. Iba den telok ajungtsü asoshi külemi yaritepa asayaba (team work), tashi angaba, achiajem kümdangba, aibelen nungi angazükba, tazüokba - ibaji asayartem dang masü saka teprangi arurtema azüoktsü nüngdaker, aser omen nung shia aliba ama, nai kechi inyakdir inyakaka iba nungji tangar dang nungi alia tajungtiba akümtsü nükjidong yur merangtsü asoshi ayongzüker.

Asayamung tenzüka CVA o Fablet United Dimapur na asayaba, CVA-i straight sets 25/14 aser 25/15 agi Fablet United madak takok ngua liasü.

Sentong nung Aliba Village Council Chairman, Tatongkaba Pongen aser Mokokchung District Volleyball Association tir, Imtipokym tenadia o tatsütsü jembi. Senti Imchen-i iba sentong len ani, NOKZOER ketdangsüri tarurtem pela-a agizük aser Aliba Baptist Arogo Pastor, Rev. Nungshi Pongen-i asayamung moaja sarasademtsü. Nungshikala Pongen-i 1990 World Cup nung mejema atenba ken 'to be number one' tena tesentepertem tzüratemdaktsü.

Iba asayamung ya 6th November, 2025 nü tembangtsü aser asayamung shibangba sentong nung MLA & Advisor, IPR, Soil & Water Conservation, Govt. of Nagaland, Imkong L Imchen tongti tesemdanger asütsü jaoka lir.

Ben Stokes-i küm ana atema tenangzüktepba yanglushiogo



Yimpoksüi/November 4, 2025 (Agencies): Ben Stokes-i küm ana atema tenangzüktepba yanglushiogo, aser pa 2027 küm kidang Ashes asayamung asayatsü aliba tashi England team nungi asayatsü, ta England and Wales Cricket Board (ECB)-i Mongolbarnü metetdaktsüogo. Test captain den tenangzüktepba yanglur aliba ya taruba küm tembangtsü liasü.

ECB-i küm ana atema contract agütsüba asayar 14 rongnung Stokes den pace bowler Jofra Archer aser lanur asayar Jacob Bethell nunger densema lir. ECB-isa, asayar 12 nem küm ka atema contract agütsüogo.

Arishi küm 34 tain all-rounder shiba mapangshia yiruba ajanga tetsükdaktsü

adoka arudar, pa tapu nung timtem aliba ajanga July ita nungi masayai arudar. Ajisüaka pa November 12 nü Perth nungi tenzüka Australia den Ashes asayatsü aliba atemabo temang anema kümer atatsü imlar.

Kasa mapang nung Jonny Bairstow nembo central contract magütsü aser spinner Jack Leach-a contract agizükertem rongnung densema mali.

England tebur cricket team managing director Rob Key-i ashiba agi, format ajak liromedemtsü temulungdang yur sempet akaba asayartem nem contract tasen agütsüogo.

"Onoki multi-format asayartem nem küm ana atema contract agütsüogo, ajita asünung dang parnok workloads manage sütettsü aser format ajak nung junga asayatettsü atema parnoki nüngdakba ama tamendakdak takang ka agütsütettsü," ta pai ashi.

"Club asayamungtem tali küma aoba mapang England team ya temaba jenjang nung toktsür asayatem tajungba achayangtsü asoshi white-ball asayartem aika nem contract agütsüogo," ta pai shisem.

Pak nunger asayar den salemtsü HI-i asayartem menokdangtsü

Yimpoksüi/November 4, 2025 (Agencies): India nung hockey asaya achayangba lokti tentet Hockey India-i, linük nungi asayartem kidanger Pakistan nungi asayartem den asayaba mapang salemtsü mesüra sensak asemtsü atema menokdangtsü, ta shiogo.

Sultan of Johor Cup nung India aser Pakistan nunger asayartem teka matepba sülen iba telemtetba ya agi, aser arishi küm tasazük aser tetsür tebur asaya ajak nung benoktsü.

Linük ana tsüngda tensa mejungi aliba mapang India tetsür aser tebur cricket team-i Asia Cup aser ICC Women's World Cup 2025 nung Pakistan nunger asayartem den salem masütsü telemtetba agi.

HI secretary general Bhola Nath Singh-i ashiba agi, HI-i taruba asayamungtem nung Olympic Charter aser Hockey international federation's (FIH) principles sülen anidaktsü.

"Onok cricket agi yimsü asür masü. Cricket asayartemi kechi inyakogo aji parnok

mulung. Onokbo Olympic Charter aser FIH-i kechi shidir iba sülen anidaktsü," ta pai ashi.

"HI asayartem dang mesalemtsü mesüra teka memateptsü atema kecha tetuyuba agüja mali. Onoki asaya tanüla sülen anidakogo. Iba dak sendakba nung onoki asayartem nem kecha tetuyuba magütsü," ta pai shisem.

"Pakistan den tarutsü nung asayaba mapang HI-i asayartem nem kecha tetuyuba magütsütsü. Onok asayatsü aser akoktsü merangtsü," ta Singh-i ashi.

Indian hockey tenzüker küm 100 ajungba benjungmung atema renemshiba sangdongba mapang Secretary-General-i iba osang ya agüja liasü.

Sentong ya Major Dhyan Chand Stadium nung agitsü. November 7 nü minute 30 atema exhibition asaya ka Sports Minister's XI aser Hockey India's mixed XI (tetsür aser tebur) tsüngda asayatsü. Iba asaya nung tetsür aser tebur national team nungi asayartemi shilem agitsü.

Senior Women's Inter-Zonal T20 Trophy tenzükogo



Nagaland Cricket Stadium, Chumoukedima nung North Zone aser South Zone na mezüngbuba asaya asayaba mapang tangokba noksa nung angur.

Dimapur, Yimpoksüi/ November 4 (TYO): 2025-26 domestic season atema IDFC FIRST Bank Senior Women's Inter-Zonal T20 Trophy tenzükogo aser asayamung mezüngbuba asaya North Zone aser South Zone na November 4nü Nagaland Cricket Stadium, Chumoukedima nung tenzükogo.

Iba asaya ya Rengma Baptist Church, Sovima Pastor Gwanilo Khing-i sarasademer tenzüka liasü.

Iba asayamung ya Board of Control for Cricket in India

(BCCI) tawabangba kübok Nagaland Cricket Association-i ayongzüka asayadar aser November 14 nü tashi asayatsü. Taküm iba asayamung nung zonal team troki shilem agidar.

BCCI-i ayongzükbba asayamung tem nung shilem agiba State Cricket Association tem zone trok küma lemsar lir. North Zone nung DDCA, Punjab CA, HPCA, Haryana CA, JKCA, UTCA Chandigarh, aser SSCB nunger densema lir.

South Zone nung Tamil Nadu CA, KSCA, Hyderabad CA, Andhra CA, Goa CA,

Kerala CA, aser CA Pondicherry nunger lir.

East Zone nung CAB, Odisha CA, Assam CA, Tripura CA, Jharkhand SCA, aser Bihar CA nunger densema lir.

West Zone nung dena aliba association temji Mumbai CA, Maharashtra CA, Gujarat CA, Baroda CA, aser Saurashtra CA nunger lir.

Kasa mapang nung Central Zone nung UPCA, Rajasthan CA, MPCA, Vidarbha CA, RSPB, CSCS, aser CA Uttarakhand nunger lir.

Tatamsa North-East Zone nung Sikkim CA, Nagaland CA, Arunachal CA, Meghalaya CA, Manipur CA, aser CA Mizoram lir.

Iba asayamung nung linük kübok tesem balala nung national aser international tetsür cricket asayartem asayaba angutsü. Tang mezüngbuba Nagaland Cricket Association-i iba premier domestic T20 championship ya ayongzüka asayar.

BILEMDANGANG

"Temaotsü karbo sama aoba sülenang yimdangi arur."